

***DEBAGOIENAN TRANTSIZIO
ENERGETIKOAREN INGURUKO
DELIBERAZIO PROZESUA BURUTZEKO
LANKIDETZA HITZARMENA***

**DEBAGOIENAN TRANTSIZIO ENERGETIKOAREN INGURUKO DELIBERAZIO
PROZESUA BURUTZEKO LANKIDETZA HITZARMENA**

Arrasaten, 2024ko irailaren ...ean

ELKARTU DIRA:

..... jaun/andrea, NANA duena, **Arrasateko** udaleko alkate den aldetik eta hura ordezkatzuz,

..... jaun/andrea, NANA duena, **Bergarako** udaleko alkate den aldetik eta hura ordezkatzuz,

..... jaun/andrea, NANA duena, **Oñatiko** alkate den aldetik eta hura ordezkatzuz,

..... jaun/andrea, NANA duena, **Aretxabaletako** alkate den aldetik eta hura ordezkatzuz,

..... jaun/andrea, NANA duena, **Eskoriatzako** alkate den aldetik eta hura ordezkatzuz,

..... jaun/andrea, NANA duena, **Antzuolako** alkate den aldetik eta hura ordezkatzuz,

..... jaun/andrea, NANA duena, **Aramaioko** alkate den aldetik eta hura ordezkatzuz,

..... jaun/andrea, NANA duena, **Elgetako** alkate den aldetik eta hura ordezkatzuz,

..... jaun/andrea, NANA duena, **Leitz-Gatzagako** alkate den aldetik eta hura ordezkatzuz,

..... jaun/andrea, NANA duena, **Deba Garaia Debagoienako Landa Garapenera Elkarteko** Lehendakaria den aldetik eta hura ordezkatzuz,

..... jaun/andrea, NANA duena, **Enpresareko** den aldetik eta hura ordezkatzuz,

..... jaun/andrea, NANA duena, **Goinerreko** den aldetik eta hura ordezkatzuz,

..... jaun/andrea, NANA duena, Berener komunitate energetikoko den aldetik eta haiek ordezkatzuz,

..... jaun/andrea, NANA duena, Ixotzen komunitate energetikoko den aldetik eta haiek ordezkatzuz,

..... jaun/andrea, NANA duena, Ekiola komunitate energetikoko den aldetik eta haiek ordezkatzuz,

..... jaun/andrea, NANA duena, Esnargi-K Koop.S komunitate energetikoko den aldetik eta haiek ordezkatzuz,

..... jaun/andrea, NANA duena, **Fagorreko** den aldetik eta hura ordezkatzuz,

..... jaun/andrea, NANA duena, **Tantai Baso Jabe Kooperatibako** den aldetik eta hura ordezkatzuz,

..... jaun/andrea, NANA duena, **Gizabidea Fundazioko** den aldetik eta hura ordezkatzuz,

Erakundeak Hitzarmen honetan beren izendapen ofizialaren arabera izendatuko dira eta izendapena baterakoa denean eta horiek nominalki identifikatzea beharrezkoa ez denean, «aldeak» edo «kideak» modura aipatuko dira.

Aldeek, dokumentu honen bidez bata bestea behartzeko gaitasun juridikoa eta jardutekoa aitortzen diotelarik,

ADIERAZTEN DUTE:

Lehenengo. Debagoiena 2030 iraunkortasun sareak bultzatuta, 2022ko ekainean *Eraginez Piztu* proposamena aurkeztu zen, Debagoienan trantsizio energetikoa sustatzeko estrategia konkretua definitzen zuena. Proposamen honek jarduteko hiru ildo nagusi identifikatzen zituen: komunitate energetikoen sustapena; eragile eta herritarrak ahalduntzea; eta deliberazio prozesuak burutzea.

Bigarren. Egitasmo honi jarraiki, Debagoiena 2030eko gobernu batzordeak Debagoienan trantsizio energetikoaren inguruko deliberazio prozesua egitea proposatu zuen. Proposamen hau bideratzeko arrazoiak honakoak izan ziren:

1. Energia eskualdearen etorkizuneko bizigarritasunaren oinarri bat delako: garapen ekonomikoa, lurralde antolamendua eta oreka, herritarren bizi baldintzak...
2. Arlo ezberdinetako eragile eta herritarrei eragiten dielako: administrazioak, enpresak, lehen sektorea, herritarrak...
3. Eskualdearen etorkizuna baldintzatuko duten erabaki estrategikoak hartu behar diren momentu historiko baten gaudelako.
4. Elkarriketa eta lanketa hori bideratzeko "Deliberazio prozesua" tresna egokia izan daitekeelako.

Hirugarren. Debagoienan garatu beharreko prozesu deliberatiboa honela definitu zen:

*"Prozesu deliberatiboa eskualdeko **eragile publiko, pribatu, komunitario, eta orohar, herritarrekin** energia trantsizioaren inguruan burutuko den prozesua izango da. Gaiari dagokion **informazio zehatz eta egokitik** abiatuta Debagoienan gertatu behar den trantsizio energetikoaren **aukera ezberdinak aztertu eta ebaluatzea** izango duelarik oinarri."*

Laugarren. Proposatzen zen prozesu deliberatiboak bazuen bereizgarri bat beste prozesuekiko ezberdintzen zituen: prozesua **lankidetzazko gobernantzatik** bultzatzea proposatzen zen, arazo konplexu bati lankidetzak publiko-pribatu-

komunitarioaren bidetik erantzuna emateko xedez. Bide horretan, prozesuaren bultzatzailea ez zen eremu publikoa soilik izango.

Horretarako, prozesu deliberatiboa burutu baino lehen aurrefase bat burutzearen beharra aurreikusi zen, eskualdeko eragileen artean adostasunak lortzeko asmoz. Aurrefasearen helburuak honakoak izan ziren:

- Deliberazio prozesua egingo zen eta zertarako egingo zen elkarrekin adostea.
- Deliberazio prozesua nola egin behar zen elkarrekin diseinatzea.
- Eragileen deliberazioa prozesuarekiko konpromisoa eta atxikimendua definitu eta lortzea.

Bosgarren. Aurrefasearen lanketa 2023ko irailean hasi zen. Horretarako, 3 geruzetako prozesu bat burutzea proposatu zen. Honakoak ziren geruzak:

- Udal ordezkariak: lehen geruzako kideak lirateke eta prozesuaren bultzatzaile nagusiak. Bere egitekoa, lehen aurrefase honetan, prozesuaren edukiontzia adostea izan zen, alegia, prozesua zertarako burutuko zen definitzea, eta zein baldintza eta printzipioen baitan burutuko zen adostea.
- Eragile gakoak: udal ordezkariak aukeratutako ordezkariak batekin batera eskualdeko eragile gakoak bildu ziren bigarren geruza honetan. Bere egitekoa prozesu deliberatiboaren dilemma eta galdera, diseinu orokorra eta gobernantza adostea izan zen.
- Bestelako eragileak: Prozesuari atxikipena emango lioketen eragileak izango lirateke.

Seigarren. Orain artean burututako prozesuan lehen bi geruzetako faseak burutu dira. Bi fase hauetan adostutakoa honakoa izan da:

1. Helburua:

Debagoienako eskualdean trantsizio energetikoaren inguruko prozesu deliberatiboa burutzeko beharra ikusi da. Konkretuki, prozesu deliberatiboak honako helburuak izango lituzke:

1. Energiaren alorrean **helburu amankomunak ezartzea kontsentsu zabalen** bitartez, eta egiteko modu berri bat abiatzea.
2. Debagoienako eskualdean **herritar eta eragileak ahalduntzea**, energiaren aferan beren **ardurak hartuz**.

2. Printzipioak:

Honakoak izan ziren adostutako printzipioak:

- Eragileek prozesuarekiko **konpromisoak hartuko dituzte**, frustrazioak ekiditeko.
- Prozesua **ez da alderdikerietarako erabiliko**.
- **Interes orokorra** interes partikularrei gailenduko zaio.
- Prozesua **ez da erabiliko aldez aurretik hartutako erabakiak** gizartearen ahotan jartzeko.
- Prozesuan zehar **parte-hartzaileak ez dira epaituak sentituko** eta beren iritzia kontuan hartuko dira.

3. Dilema:

Adostutako dilema honakoa izan zen:

*“Debagoiena **energia kontsumo handiko eskualdea** da, besteak beste **ehun industrialak eskualdean duen garrantziarengatik eta bizi ereduarengatik**. Dagoeneko eraldaketa energetiko, ekologiko, sozial eta ekonomikoa gertatzen ari da. Debagoienako eskualdeak garapen eredu iraunkor baterako bidea bultzatu beharko du, eta horrek **kontsumo energetikoa gutxitzea eta energia berriztagarrien garapena** ekartzen du.*

*Baina kontsumo energetikoa gutxitzeak **ehun industrialak murriztu dezake eta bizi baldintza eta ereduak eraldatu**. Era berean, energia berriztagarrien **eskala handiko proiektuen garapenak biodibertsitatean eta landalurrean eragin dezake**. Horren ondorioz, **kontsumo energetikoaren murrizketa eta eskualdean energia berriztagarriak zein mailatan** garatu beharko liratekeen definitu beharko da, alegia, eskualdeak izango duen **dependentsia energetiko maila**.*

*Halaber, eraldaketa hau egiteko moduak **desorekak** areagotu ditzake pertsona, erakunde, herri eta lurralde ezberdinen artean.”*

4. Galdera:

Prozesu deliberatiboaren galdera honakoa izatea adostu zen:

*“**Zein ekintza edo aldaketa** burutu beharko dituzte Debagoienako **tokiko eragileek energia kontsumoa murrizteko eta energia berriztagarrien garapenerako?**”*

Galdera honi erantzuterako orduan honako irizpideak hartu beharko dira kontuan:

- Debagoienako eskualdearen **ehun industrial eta bizi baldintza eta ereduak duen inpaktua**.
- Debagoienako eskualdearen **dependentsia energetiko maila**.
- Energia berriztagarriek **biodibertsitate eta landalurrean izan dezaketen inpaktua ahalik eta txikiena izatea**.
- **Ahalmen eta erantzukizunen arteko proportzionaltasuna** pertsona, erakunde, herri eta lurralde ezberdinen artean.”

5. Diseinu metodologikoa:

Diseinu metodologikoaren xehetasunak aurrerago adostuko badira ere, aurrefasean prozesu deliberatiboaren marko orokorra adostu zen. Marko orokor honen baitan prozesu deliberatiboak hiru fase izango lituzke: lehen fasean mahai sektorialak burutuko lirateke, dilema eta galdera kontuan hartuz lantzea interesgarria ikusten diren gaiak landuz; bigarren fasean herritarren batzarra burutuko litzateke, ausaz hautatutako herritarrek gomendio sorta bat burutuko luketelarik; eta azken fasean, mandatua burutu duten eragileek, gomendioak aztertu, haien inguruan deliberatu eta erantzuna emango liokete. Horrez gainera egokia ikusi zen herritarrei irekitako ekimenak burutzea eta baita gazteek leku propioa izatea ere.

Aipatutako adostasunez gain, prozesuak izan beharko lituzkeen baldintzak eta gobernantza eredua adostu ziren.

Zazpigarren. Aipatutako guztia kontuan izanda, hitzarmen hau sinatzen duten aldeek egokia ikusi dute prozesu deliberatiboaren gobernantza eta antolaketa eredua definituko duen lankidetzazko hitzarmena sinatzea. Lankidetzazko hitzarmen honek izaera publiko-pribatu-komunitarioari eman nahi dio erantzuna, alegia, prozesu honek izan nahi duen bereizgarritasunari.

Hitzarmen honek sinatzaileen eskubide eta betebeharrak definituko ditu, eta baita prozesua aurrera eramateko beharrezkoak izango diren eremuak eta egitekoak ere. Honen bitartez, sinatzaileek beren konpromisoa eta interesa berretsi nahi dute.

Aipatutako guztiagatik, aldeek Lankidetzazko Hitzarmen hau sinatzea erabaki dute, honako klausula hauei jarraituz:

KLAUSULAK

Lehenengoa.- Hitzarmenaren xedea.

Hitzarmen honen helburua Debagoienan burutuko den trantsizio energetikoaren inguruko deliberazio prozesua burutzeko beharrezkoa den gobernantza eredua definitu eta arautzea izango da. Gobernantza eredu hau deliberazio prozesua burutzeko soilik eratuko da, hitzarmenaren iraungitzearekin iraungita geratuko delarik.

Hitzarmen hau sinatzen duten eragileek Debagoienan trantsizio energetikoari buruzko deliberazio prozesua burutzea erabakitzen dute. Zentzu horretan, eta aipatutako dilema

eta galdera oinarri hartuta, sinatzaileak prozesu deliberatiboaren mandatugile bihurtzeko konpromisoa hartzen dute.

Hitzarmen honen helburua aldean arteko harreman, antolaketa eta erabakimen prozesuak arautzea izango da.

Bigarrenen.- Araubide juridikoa.

1. Hitzarmen hau Sektore Publikoko Araubide Juridikoaren buruzko urriaren 1eko 40/2015 Legeari (aurrerantzean, "40/2015 legea") lotutako hitzarmen administratibo bat da, bereziki 47-53 bitarteko artikuluetan (biak barne).
2. Arestian aipatutako 40/2015 Legean, 47.2. artikuluan, aurreikusitako hitzarmen moten artean, honakoa herri administrazioen eta Zuzenbide Pribatuko beste subjektu batzuen artean sinatutako hitzarmen bat da, eta hura egikaritzuz ez da berau sinatzen duten Zuzenbide Pribatuko subjektuen alde eskumen administratiborik lagatzen.
3. Euskadiko Tokiko Erakundeei buruzko 2/2016 Legearen 17. artikuluko hainbat xedapenei jarraiki, Hitzarmen hau sinatzen duten erakunde publikoek hemen jasotako gaiari loturiko eskumendun erakundeak dira, eta beraz ahalmenak daude hitzarmen hau sinatzera.
4. Azkenik, hitzarmen hau aipatutako 2/2016 Legearen 75. artikuluko deliberazio prozesuei buruz dioenari lotuta egongo da.

Hirugarrenen.- Prozesu deliberatiboaren helburua

Debagoienan burutuko den trantsizio energetikoaren inguruko prozesu deliberatiboak honako helburuak izango ditu:

1. Energiaren alorrean **helburu amankomunak ezartzea kontsentsu zabalen** bitartez, eta egiteko modu berri bat abiatzea.
2. Debagoienako eskualdean **herritar eta eragileak ahaldundutzea**, energiaren aferan beren **ardurak hartuz**.

Laugarrenen.- Prozesu deliberatiboaren izaera

Prozesu deliberatiboaren izaera lankidetzaz publiko-privatu-komunitariotik eratorritakoa izango da. Modu honetan dagoeneko Debagoienan gertatzen den lankidetzazko ibilbide eta tradizioari erantzun nahi zaio.

Prozesu deliberatiboaren bultzatzaileak hitzarmen hau sinatzen duten izaera ezberdineko erakundeak izango dira. Ondorioz, hitzarmen honen sinatzaileak izango dira bai dilema eta galdera proposatutako dutenak, eta baita prozesu honetatik erator daitezkeen gomendioei erantzuna emango dietenak ere.

Bosgarrenen.- Aldeek prozesuarekiko hartzen dituzten konpromisoak

Hitzarmen hau sinatzen duten aldeek prozesuarekiko hartzen dituzten konpromisoak honakoak izango dira:

- Prozesua hasi eta bultzatzeko konpromisoa.
- Prozesuan ateratzen denari bide emateko konpromisoa. Bide emateak ez du bere horretan burutzea esan nahi, baizik eta aztertua eta bideratua izan dadila, eta erantzun bat emana.
- Prozesua dagozkion bermeak beteta garatu dadin adostutako baldintzak betetzen direla ziurtatzeko eta dagozkion mekanismoak martxan jartzeko konpromisoa.
- Entzute sakonean eta deliberazioan formazioa jasotzeko konpromisoa.
- Prozesua ebaluatzeko konpromisoa, prozesua gertatzen den bitartean.

Seigarrena.- Antolakuntza eredua

Deliberazio prozesua garatzeko aldeek adostutako gobernantza ereduak honako guneak izango lituzke:

- i. Mandatu organoa: Gune honetan parte hartzen duten eragileak hitzarmen hau sinatzen duten eragileak izango dira. Gune hau izango da prozesu deliberatiboaren gobernantza sistemaren erabakigune nagusia. Prozesuaren inguruan egon daitezkeen erabakiak hartzea gune honi dagokio. Gune honek ematen dio hasiera eta bultzada prozesu deliberatiboari dilema eta galderaren bitartez, eta gune honek ere hartzen du gomendioei erantzun eta jarraipena emateko konpromisoa.

Izaera mixtoa izango du gune honek, alegia, sektore publikoa, pribatua eta komunitarioa ordezkatzeko dituen gunea izan beharko du. Konkretuki honakoak izango dira sektore bakoitzeko ordezkariak:

- Sektore publikoa: Arrasate, Bergara, Oñati, Aretxabaleta, Eskoriatza, Antzuola, Aramaio, Elgeta eta Leintz – Gatzagako udalak.
- Enpresa sektorea: Enpresare eta Fagor.
- Sektore komunitarioa: Deba Garaia Debagoienako Landa Garapenerako Elkartea, Goiener, Berener komunitate energetikoa, Ixotzen komunitate energetikoa, Ekiola komunitate energetikoa, Esnargi-K Koop.S komunitate energetikoa eta Tantai Baso Jabe Kooperatiba.

Guztira, mandatu organoak 27 kide izango ditu, honela banatuta:

- Sektore publikoko ordezkariak 18 kidez osatutakoa izango da. Udal guztiak egongo dira ordezkatuak udal ordezkariaren bitartez, baina

eskualdearen aniztasun ideologiko eta politikoa batze aldera, honakoa izango da udal ordezkarien banaketa: EHBilduk 8 udal ordezkari izango ditu; EAJk 6 udal ordezkari; PSE-EEk 2 udal ordezkari; Elkarrekin Podemosek udal ordezkari 1; eta Leintz-Gatzagako udalak ordezkari 1. Udal bakoitzeko organo eskudunak erabakiko du udalaren ordezkaritza zein izango den. Udal alderdi politikoen artean adostutakoari jarraiki, honakoa izango da udal ordezkaritza:

- **Arrasate:** EHBilduko ordezkari bat, EAJko ordezkari bat, PSE-EEko ordezkari bat eta Elkarrekin Podemoseko ordezkari bat.
- **Bergara:** EHBilduko ordezkari bat, EAJko ordezkari bat eta PSE-EEko ordezkari bat.
- **Oñati:** EHBilduko ordezkari bat eta EAJko ordezkari bat.
- **Aretxabaleta:** EHBilduko ordezkari bat eta EAJko ordezkari bat.
- **Eskoriatza:** EHBilduko ordezkari bat eta EAJko ordezkari bat.
- **Antzuola:** EHBilduko ordezkari bat.
- **Aramaio:** EHBilduko ordezkari bat.
- **Elgeta:** EHBilduko ordezkari bat eta EAJko ordezkari bat.
- **Leitz_Gatzaga:** Udal gobernuko ordezkari bat.

- Gainerako erakunde sinatzaileei dagokionez, erakunde bakoitzak ordezkari bana izango du mandatu organoan.

- ii. Jarraipen batzordea: Mandatu organoak izendatutako gehienez ere 6 kidez osatutako gunea izango da. Gune honen eraketan izaera publiko-pribatu-komunitarioa errespetatuko da. Gune honen funtzioa prozesuaren jarraipenerako dagozkion erabakiak hartu eta proposamenak egitea da.
- iii. Talde sustatzailea edo bulego teknikoa: Debagoiena 2030 iraunkortasun sarea bultzatzen duen Gizabidea Fundazioa izango da bulego teknikoaren ardura hartuko duen erakundea, eta bera izango da prozesuari bultzada emateaz arduratuko dena. Talde sustatzaile honen barruan ere bestelako batzordeak aurreikusten dira: metodologia, komunikazio eta edukien batzordeak. Talde honen parte bestelako aholkularitza enpresa, eragile edo udaletako teknikariek ere izan ahalko dute.
- iv. Ebaluazio eta ikerketa taldea: Kanpo aholkularitzak eta unibertsitateek osatuko dute lan-taldea da hau. Bere egitekoa prozesuaren ebaluaziorako

adierazleak zehaztea, ikasketak sortzea eta sistematizatzea eta prozesuaren bermeak errespetatzen direla ziurtatzea izango da.

- v. Aholku batzordea: D2030 iraunkortasun sareak gidatuta, prozesu deliberatiboetan esperientzia duten erakundeek osatuko dute batzorde hau. Horien artean egongo dira Arantzazulab, Olaso Dorrea, Parte-hartuz eta Deliberativa erakundeak.

Zazpigarrena.- Funtzionamendua

Honakoak dira aipatutako gune nagusien funtzioak:

1. Mandatu organoa:

- a) Deliberazio prozesuaren dilemma eta galdera adostea.
- b) Prozesuari hasiera eta bultzada ematea, dilemma eta galderaren formulazioaren bitartez.
- c) Gobernantza sistemaren batzorde edo lan-taldeak eratu edo kentzea.
- d) Gobernantza sistemaren batzorde eta lan-taldetako kideak hautatzea.
- e) Jarraipen batzordeko osaera eta kideak hautatzea.
- f) Bulego teknikoaren osaera adostea.
- g) Deliberazio prozesuaren diseinua adostea.
- h) Herritarren batzarreko kideak hautatzeko proposamena onartzea.
- i) Herritarren gomendioei erantzuna ematea, horretarako aurrez burututako deliberazioaren bitartez.
- j) Prozesuak behar duen aurrekontuaren inguruko erabakiak hartzea. Erabaki hauetan soilik finantzaketa ardura duten erakundeek hartuko dute parte, beti ere aparteko ekarpenak eskatuko balitu, eta aho batez onartu beharko dira.

2. Jarraipen batzordea:

- a) Prozesuak aurrera jarrai dezan beharrezkoak diren erabaki operatiboak hartzea.
- b) Prozesuan zehar beharrezkoak izan daitezkeen erabakien inguruko proposamena egitea mandatu organoari.
- c) Gobernantza sistemaren batzorde edo lan-taldearen eraketa eta kentze proposamena burutzea mandatu organoari.
- d) Gobernantza sistemaren batzorde eta lan-taldetako kideak proposatzea mandatu organoari.
- e) Deliberazio prozesuaren diseinuaren inguruko lanketa burutzea eta mandatu organoari proposamena egitea.
- f) Herritarren batzarreko kideak hautatzeko proposamena mandatu organoari egitea.
- g) Prozesuak behar dituen aurrekontu aldaketak mandatu organoari proposatzea.
- h) Prozesu deliberatiboaren komunikazioaren inguruko erabakiak hartzea.

- i) Hitzarmen honen jarraipena egitea, hitzarmen honetan jasotzen den hogeigarren klausulan jasotakoari jarraiki. Funtzio honetan Gizabidea Fundazioak ere hartuko du parte.

3. Bulego teknikoa:

- a) Prozesuaren ardura tekniko orokorra izango du.
- b) Prozesuak behar dituen proposamen teknikoak proposatuko dizkio jarraipen batzordeari edo mandatu organoari.
- c) Prozesua burutzeko baliabide pertsonalak jarriko ditu Gizabidea Fundazioak, bera izango delarik langile horiekiko arduradun eta erantzule bakarra, eta baita egiten diren kontratuekiko ere.
- d) Prozesua gertatu dadin beharrezkoak diren aholkularitza edo bestelako kontratuak burutzeko funtzioa izango du, beti ere mandatu organoaren edo jarraipen batzordearen aurretiazko adostasunaren bitartez.
- e) Prozesuaren baliabide material eta pertsonalak bere esku egongo dira, eta hauek kudeatzeko ardura izango du.
- f) Prozesuaren kontu orokorrak kudeatzeko betebeharra izango du, jarraipen batzordeari eta mandatu organoari hauek aurkeztuz, eta baita proposatu daitezkeen aldaketak ere.
- g) Komunikazio estrategiaren proposamena landu eta aurkeztuko dio jarraipen batzordeari.
- h) Prozesuaren diseinua garatzeko ardura izango du, horretarako kontratatutako bestelako eragileekin batera. Prozesuaren diseinuaren proposamena jarraipen batzordeari eta mandatu organoari aurkeztu beharko dizkio, hauen adostasun eta oniritzia jasotzeko.

Zortzigarrena.- Erabakimena.

Prozesuari dagozkion erabakiak bi eremutan ezberdintzen dira:

1. Gomendioei erantzuna:

Prozesu deliberatiboaren helburua adostasunak lortzea da eta energia trantsizio gaia ikuspegi polarizatuetatik aldentzea. Horregatik, herritarrekin eta eragileekin burututako prozesu deliberatibotik eratortzen diren gomendioei erantzuteko hartutako erabakiek aldeen % 70eko babesa izan beharko dute. Era berean, ikuspegi eta lurralde oreka bermatze aldera, erabakiak baliozkoak izan daitezen honako baldintzak izan beharko dituzte:

- Lurralde oreka bermatzeko, hartutako erabakiak gutxienez Eskoriatza, Antzuola, Aramaio, Elgeta edo Leintz – Gatzagako udal ordezkarien 3/5ek onartu beharko dute.

- Lankidetzazko izaera bermatzeko, hartutako erabakiak gutxienez enpresa sektoreko eta sektore komunitarioko ordezkari banaren oniritzia jaso beharko du.

2. Kudeaketa erabakiak:

Prozesuak behar dituen kudeaketa erabakiei dagokionean, gehiengo osoz hartuko dira erabakiak. Erabaki hauen artean kokatzen dira prozesuak aurrera jarraitzeko behar dituenak, hala nola, beharrezkoak diren kontratuak burutzea, prozesuaren diseinua adostea, herritarren batzarren osaera adostea, etab. Erabaki horietan ere, ikuspegi eta lurralde oreka bermatze aldera, honako baldintzak ezartzen dira:

- Lurralde oreka bermatzeko, hartutako erabakiak gutxienez Eskoriatza, Antzuola, Aramaio, Elgeta edo Leintz – Gatzagako *udal* ordezkarien 3/5ek onartu beharko dute.
- Lankidetzazko izaera bermatzeko, hartutako erabakiak gutxienez enpresa sektoreko eta sektore komunitarioko ordezkari banaren oniritzia jaso beharko du.

Erabakia baliozkoa izateko gutxienezko quoruma % 50eko izango da.

Jarraipen batzordeko erabakiak ere gehiengo osoz hartuko dira, eta beti ere gutxienez sektore publiko, pribatu eta komunitarioko ordezkari baten aldeko botoa beharko luke.

Bederatzigarrena.- Deliberazio prozesuaren diseinu metodologikoaren marko orokorra.

Diseinu metodologikoaren xehetasunak prozesuan zehar adostuko badira ere, prozesuak honako faseak izan ditzakeela aurreikusten da:

- Mahai sektorialak: Mahai sektorial hauek prozesuaren dilema eta galdera kontuan hartuz osatutakoak izango dira. Honen helburua, dilemaren ezaugarri ezberdinen inguruko iritziak jasotzea izango da, horretarako izaera ezberdineko eragileak bilduz.
- Herritarren batzarra: Debagoienan ausaz hautatutako herritarrek osatuko dute herritarren batzarra. Bertako kideen kopurua, herri bakoitzak izango dituen kideak, edo kideak aukeratzeko prozedimendua, mandatu organoak erabakiko ditu. Era berean, herritarren batzarren osaera *Emakumeen eta gizonen berdintasunerako eta emakumeen aurkako indarkeria matxistarik gabe bizitzeko Legearen testu bat egina onartzen duen 1/2023 Legegintzako Dekretuak* ezarritakoari atxikiko zaio.
- Herritarren ekarpenak: Prozesuan zehar herritarren iritziak modu zabalean jasotzeko mekanismoak ahalbidetuko dira.

- Gazteen ekarpenak: Prozesu deliberatiboak gazteen ekarpenak jasotzeko guneak ahalbidetuko ditu.
- Mandatu organoaren deliberazioa: Prozesu deliberatiboan jaso diren gomendioei erantzuna emateko mandatugileek burutu beharreko deliberazio fasea izango da hau.

Hemen jasotzen den diseinu metodologikoaren marko orokorra hasiera bateko marko adostua da. Hala ere, mandatu organoak prozesuan zehar hemen jasotzen dena aldatu ahal izango dute, edo xehetasun handiagoz garatu.

Hamargarrena.- Prozesu deliberatiboaren baliabideak.

Prozesu deliberatiboaren baliabideek jatorri hau izango dute:

- a) Aldeen aurrekontuen kargura jasotzen dituen diruzko ekarpenak.
- b) Gobernantza sistemako kide ezberdinek espezietan egindako ekarpenak.
- c) Edozein enpresa edo erakunde publikotik jasotzen diren dirulaguntza, laguntza, babesletza eta dohaintzak.
- d) Bere jardueren ondorioz eskura daitezkeen diru sarrerak, nahiz bere ondareen ondoriozko errendimenduak.
- e) Zuzenbidez baliozkoa den beste edozein.

Hamaikagarrena.- Finantziazioa eta ekarpen arruntak

Prozesu deliberatiboak 384.000 €ko aurrekontua izango duela aurreikusten da. Aurrekontu hau finantziazteko egingo diren ekarpenak honakoak izango dira:

- Sektorre publikoa: Aurrekontuaren %50a. Udal bakoitzak bere 2024. urteko aurrekontu kontsolidatuaren arabera dagokion proportzioan erantzungo dio aipatutako kopuruari.
- Enpresa sektoreak: Aurrekontuaren % 25a, enpresen artean adostutako moduaren arabera. Ekarpn kopuru honen barruan sartu ahal izango dira hitzarmen honen sinatzaileak ez diren enpresek egiten dituzten ekarpenak.
- Bestelako diru iturriak: Aurrekontuaren % 25a.

Eragile bakoitzak bere diru ekarpenak D2030 iraunkortasun sarea bultzatzen duen Gizabidea Fundazioari egingo dizkio. Gizabidea Fundazioak kontuak kudeatzeko ardura beregan hartuko du. Zentzu honetan, Gizabidea Fundazioak prozesua bideratzeko egin beharreko 15.000 € gaineko zerbitzu kontratuetan konkurrentzia askatasuna, publizitatea eta gardentasun printzipioak gidatuta jardungo du.

Hamabigarrena.- Udalen diru ekarpenak

Udalek Gizabidea Fundazioari egingo dizkioten diru ekarpenak dirulaguntza zuzen izaera izango dute, eta beraz, *Dirulaguntzei buruzko azaroaren 17ko 38/2003 Lege*

Orokorra atxikiko dira. Zentzu horretan, hitzarmen honi proiektuaren memoria eta aurrekontua atxikituko zaizkio.

Dirulaguntza hauek bateragarriak izango dira jaso daitezkeen bestelako dirulaguntza edo ekarpenekin. Hala ere, proiektu edo prozesu honetarako jasotako dirulaguntza edo ekarpenek ezingo dute proiektuaren kostu oso gainditu.

Udalek bideratutako dirulaguntzak bi ordainketetan burutuko dira, 2024 eta 2026. urteetan. Diruz lagundutako gastuak udal organo eskudunek hitzarmen hau onartzeko erabakia hartzen duten unetik sortutakoak hartuko dira kontuan. Konkretuki, behean jasotzen den taularen arabera burutuko dira dirulaguntzak, dagokion kopuru eta epeetan:

HERRIAK	KOPURUA	2024	2026
ARRASATE	69.122,52 €	41.473,512 €	27.649,00 €
BERGARA	42.107,80 €	25.264,68 €	16.843,12 €
OÑATI	35.038,86 €	21.023,31 €	14.015,54 €
ARETXABALETA	22.740,05 €	13.644,03 €	9.096,02 €
ESKORIATZA	9.410,51 €	5.646,30 €	3.764,20 €
ANTZUOLA	5.628,41 €	3.377,04 €	2.251,36 €
ARAMAIO	3.643,66 €	2.186,19 €	1.457,46 €
ELGETA	3.232,43 €	1.939,45 €	1.292,97 €
LEITZ-GATZAGA	1.075,76 €	6.45,45 €	430,30 €
GUZTIRA	192.000,00 €	115.200,00 €	76.800,00 €

Hamairugarrena.- Udalen dirulaguntzen ordainketa

Aurreko klausulan aipatu den bezala, dirulaguntzak bi zatitan ordainduko dira, dirulaguntza horien zenbatekoa banatzen den urterokoekin bat etorriz:

Lehenengoa, zehaztutako kopuruaren %60, ordainduko da hitzarmena sinatzean; baldin eta aurkezten badira ondoko dokumentuak, udal zerbitzuek egiazta ditzaten:

- Zerga obligazioen eta Gizarte Segurantzako ordainketetan egunean egotearen ziurtagiri eguneratua.
- Zinpeko aitorpena, beste erakunde edo organismo batzuei egindako dirulaguntza eskaerak edo dagoeneko eman zaizkion dirulaguntzak jasotzen dituenak.
- Ordainketa egingo den kontuaren titulartasun agiria.

Bigarrena berriz, %40, hitzarmenaren indarraldia bukatuta udal zerbitzuek egiazta ditzaten. Horretarako, gehienez ere hitzarmenaren indarraldia bukatu baina 2 hilabete lehenago aurkeztu beharko da, alegia, 2026. urteko apirilaren 30erako, dirulaguntzaren justifikazioa.

Hamalagarrena.- Udalen dirulaguntzen justifikazioa

1. Diruz lagundu ahalko diren gastuak honakoak izango dira:
 - Langileen kostuak: Gizabidea Fundazioko langileek proiektu honetarako eskainitako orduak.
 - Kanpo-kontratazioak: Gizabidea Fundazioak, ezagutza berezitua behar duten lanak burutu ahal izateko kontratatutako aholkularitza enpresen gastuak.
 - Gastu orokorrak: Proiektuari atxikitzen zaizkion gastu zuzenak.
 - Zeharkako gastuak: Gizabidea Fundazioaren zeharkako gastuak, beti ere diruz lagundutako jarduera gainerako jardueretikiko duen proportzioaren arabera.
 - Ustiapen gastu osagarriak: Material, hornikuntza, edo proiektutik zuzenean eratorritako produktu berdintsuen kostuak.
2. Dirulaguntza zuritzeko kontu zurigarria aurkeztuko da. Kontu zurigarriak honako hauek bilduko ditu:
 - a. Jardueraren memoria: Jarduera burutu dela ziurtatzen duen dokumentua izango da, burutu den jarduera eta emaitza adieraziko dituen.
 - b. Memoria ekonomikoa: Jardueraren kostua jasotzen duen memoria izango da. Bertan, jardueraren sarrera eta gastuak jaso beharko dira, eta dagozkion justifikazio dokumentuak aurkeztu, hala nola, fakturak, langileen soldatak ziurtatzen dituzten dokumentuak, edo bestelako froga agiriak, gastuen kontzeptuen baitakoak. Ez dira onartuko fakturak edo egiaztagiriak bezala onartuak izateko legezko baldintzak betetzen ez dituzten gastu-ohar edo bestelako dokumentuak.
 - c. Zerga betebeharretan eta Gizarte segurantzakoetan egunean daudela egiaztatzen duen eguneratutako dokumentazioa.
 - d. Zinpeko aitorpena, beste erakunde edo organismo batzuei egindako dirulaguntza eskaerak edo dagoeneko eman zaizkion dirulaguntzak jasotzen dituen.
 - e. Dokumentazio grafikoa: Diruz lagundu den jardueraren argazki edo bideoak.

3. Gizabidea Fundazioak ez baditu hitzarmen honetan edo legedian ezarritako baldintzak betetzen, dirulaguntza jasotzeko eskubidea guztiz edo zati batean galdutzat joko zaio, eta dirulaguntza edo zati bat eta dagozkion berandutza interesak ordaindu beharko ditu.

Hamabosgarrena.- Bestelako erakundeen ekarpenen epeak

Udalak ez diren bestelako erakundeen beren ekarpenak ere bi epetan egingo dituzte: lehenengo ekarpena % 60koa izango da, eta hitzarmen hau sinatzera unean burutuko da; bigarrena berriz, %40koa izango da eta hitzarmen honen indarraldia amaitu baina 2 hilabete lehenago burutuko da, alegia, 2026. urteko apirilaren 30erako.

Hamaseigarrena.- Ausazko zozketarako udalen ardura

Udalek, Euskadiko Tokiko Erakundeei buruzko 2/2016 Legearen 75. artikuluan oinarrituta, herritarren batzarrak eratzeke beharrezkoak diren zozketak burutzeko ardura hartzen dute. Zozketa horietatik ondorioztatutako herritarren zerrendak Gizabidea Fundazioari igorriko dizkio udal bakoitzak, beti ere datuen babeserako araudiak ezarritako mugen barruan. Datuen babesa bermatzeko udalen eta Gizabidea Fundazioaren artean aldebiko hitzarmenak sinatuko dira, hitzarmen honi atxikitzen zaizkionak.

Hamazazpigarrena.- Jasangarritasun ekonomiko eta finantzarioa. Aparteko ekarpenak.

Prozesu deliberatiboa ikuspuntu ekonomiko eta finantzariotik iraunkorra izan dadin, aldeek diru sarrerak eta finantziarioa eskuratzeko aurreikusitako bide eta baliabideak elkarrekin aztertuko dituzte. Aurrekontuan aldaketarik egiteko edo aparteko ekarpenik egiteko, hamaikagarren xedapenean aipatu diren eragile finantzario guztiek beren adostasuna azaldu beharko dute aho batez.

Udal ordezkarien kasuan, adostasuna udal organo eskudunak eman beharko du, lege ezarritako prozedura eta mugen barruan.

Bestelako erakundeen kasuan, beren barne prozedura eta arauetara egongo dira lotuak.

Hemezortzigarrena.- Fede ona eta informatzeko betebeharra.

1.- Aldeek fede onez kolaboratzeko konpromisoa hartzen dute. Bereiziki, jarrera irmoa hartzen dute Debagoienako trantsizio energetikoari dagokion prozesu deliberatiboa bultzatzeko eta sustatzeko.

2.- Modu berean, Aldeek Hitzarmen honetan eragina izan dezakeen edozein alderdiren inguruan elkarri informatzeko konpromisoa hartzen dute, eta bereziki zereginak modu egokian betetzean eragina izan dezaketen horietan.

Hemeretzigarrena.- Indarraldia.

Hitzarmen hau sinatzen den unetik 2026eko ekainaren 30era bitartean egongo da indarrean. Hitzarmena izenpetzen duten aldeek edozein unetan utzi dezakete bertan behera epe hori amaitu aurretik, mandatu organoak adostutako prozedurari jarraituz; kasu horretan, idatziz eta utzi nahi den data aurreko 2 hilabeteko aurreikuspenarekin egin beharko luke.

Aldeetako batek hitzarmena utziko balu, prozesu deliberatiboak uzte data aurretik konprometitutako gastuen erantzule ere izango da, beti ere dagokion parte eta proportzioan. Uzte dataren ondoren konprometitutako gastuei dagokionez, hitzarmena utzi duen aldea ez da erantzule izango. Gastu horiek definitu eta adosteko, Jarraipen Batzordearen eta hitzarmena uzten duen aldearen arteko batzorde mixtoa eratuko da.

Aldeetako batek hitzarmena uztearen ondorioz aurrekontuetan sor daitezkeen doikuntza erabakiak mandatu organoak hartuko ditu, beti ere hamazazpigarren klausulan jasotakoari jarraiki.

Aurreikusitako epea amaitu aurreko edozein unetan, hitzarmenaren sinatzaileek aho batez erabaki ahal izango dute hitzarmena luzatzea, gehienez beste urte betez, edo hitzarmena amaitzea. Hitzarmena urte betez luzatzea erabakiko balute, dirulaguntzen azken justifikazioa eta 2. ordainketa luzapena amaitu baino 2 hilabete lehenago burutu beharko litzateke.

Hogeigarrena.- Hitzarmenaren jarraipen batzordea

Hitzarmen honetako 7.2 klausulari jarraiki, mandatu organoak aukeratutako jarraipen batzordea izango da hitzarmenaren jarraipena egingo duena. Kasu honetan, Gizabidea Fundazioa, hitzarmen honen sinatzaile den neurrian, erabakietan parte hartuko luke, bai deliberazioan eta baita bozketan ere. Akordioak botoen gehiengoarekin hartuko dira, eta beti ere gutxienez sektore publiko, pribatu eta komunitarioko ordezkariaren baten aldeko botoa beharko dute. Jarraipen Batzorde honen akordioak aktan jasoko dira. Nolanahi ere, Jarraipen Batzordea, akordio honetan xedatutakoak ez ezik, Sektore Publikoaren Araubide Juridikoari buruzko urriaren 1eko 40/2015 Legearen 15. Artikuluan eta hurrengoetan aurreikusitako funtzionamendu arauak ere arautuko dute.

Hitzarmenaren jarraipen batzordeak, besteak beste, honako egiteko hauek izango ditu:

- Hitzarmenean erabakitakoaren kudeaketa, jarraipena, zaintza eta kontrola.

- Hitzarmenetik eratorritako interpretazio eta betetze arazoak konpontzea
- Egokitzat jotzen dituen hobekuntzak eta aldaketak formalizatzea proposatzea.
- Hitzarmenaren indarraldia amaitzean, adostutako jarduerak eta justifikazio dokumentazioa egiaztatzeko dagokion akta egitea.

Hogeitabatgarrena.- Aldeek beren gain hartutako betebeharrak eta konpromisoak ez betetzetik eratorritako ondorioak.

1. Hitzarmenaren sinatzaile batek bere gain hartutako betebeharrak eta konpromisoak ez betetzea hitzarmena suntsiarazteko arrazoia izango da, Sektore Publikoaren Araubide Juridikoari buruzko urriaren 1eko 40/2015 Legearen 51.2.c) artikuluan xedatutakoaren arabera.
Hitzarmena sinatu duten aldeetako edozeinek jarraipen batzordeari jakinarazi ahal izango dio egoera. Jarraipen batzordeak, hala ikusiz gero, errekerimendu bat jakinarazi ahal izango dio bete ez duen aldeari, epe jakin batean bete ez direla uste diren betebeharrak edo konpromisoak bete ditzan.
Errekerimenduan adierazitako epea igaro ondoren, salatu den ez-betetzeak jarraitzen badu, hura abiarazi zuen aldeak suntsiarazteko arrazoia dagoela jakinarazi beharko du, eta, horren ondoren, hitzarmena suntsitutzat joko da.
Hitzarmena ez betetzeagatik suntsiarazteak egiaztatuta geratzen diren kalteen kalte ordaina ekarri ahal izango du.
2. Betebeharrak eta konpromisoak ez betetzea ekimen honen sinatzailearen bat banantzearen ondorioz gertatzen bada, hark dagokion kalte ordaina hartu beharko du bere gain, betetzen ari den aldeari eta bertan jarraitzen duten hitzarmenaren gainerako sinatzaileei kaltegabetasuna bermatzeko.
Betebeharrak ez betetzearen ondorioz bete ez duen alde sinatzailea hitzarmenetik kanporatzeko arrazoia badago, hala erabaki ahal izango du mandatu organoak gainontzeko kideen aho bateko erabakiz.

Hogeitabigarrena.- Hitzarmena azkentzeko eta suntsiarazteko arrazoiak.

1. Hitzarmen hau azkendu egingo da bere xedeko jarduerak betetzen direlako edo suntsiarazteko arrazoia dagoelako.

Hauek dira suntsiarazteko arrazoiak:

- a) Hitzarmenaren indarraldia igarotzea, luzatzea erabaki gabe.
- b) Sinatzaile guztien aho bateko akordioa.
- c) Hitzarmena nulua dela deklaritzen duen erabaki judizialagatik.

- d) Hitzarmenean edo beste lege batzuetan aurreikusita dagoen beste edozein arrazoiengatik.
2. Hitzarmena bete eta/edo suntsiarazi ondoren, likidazioa egingo da, alde bakoitzaren betebeharrak eta konpromisoak bete diren zehazteko.
- a. Likidaziotik ondorioztatzen bada alderen batek gauzatutako jardueren zenbatekoa txikiagoa dela alde horrek hitzarmenaren gainerako aldeengandik exekuzioa finantzatzeko jaso zituen funtsak baino, alde hark beste aldeetako bakoitzari dagokion soberakina itzuli beharko die, likidazioa onartzen denetik gehienez hilabeteko epean.
Aurreko paragrafoan aipatutako gehieneko hilabeteko epea igaro eta itzulketarik egin ez bada, itzulketa horri aplikatu dakioken berandutze interesa ordaindu beharko zaie beste aldeei, hori ere hilabeteko epean, une horretatik zenbatzen hasita. Interes hori, nolana ere, gastu publikoa eta sektore publikoaren jardura ekonomiko-finantzarioa arautzen dituzten xedapen orokorren ondoriozkoa izango da.
- b. Handiagoa bada, hitzarmenaren gainerako aldeek, likidazioa onartzen denetik hilabeteko epean, dagokion aldeari ordaindu beharko diote bakoitzari dagokion zatia, alde bakoitzak hitzarmenaren arabera emango zituela hitz emandako zenbatekoen gehieneko mugarekin. Diferentzia auditoria txostenetik abiatuta kalkulatu da, suntsiarazpenaren egunera arte garatutako jarduerak kontuan hartuta. Hitzarmeneko aldeek ez dute inolako eskubiderik izango gainerakoei gehieneko muga horiek gainditzen dituen zenbatekorik eskatzeko.

Hogehirugarrena.- Jabego intelektualak

Aldeek sortutako duten ezagutzak jabego partekatua izango du, eta lankidetzak dirauen bitartean garatutako ezagutza kide guztientzat izango da. Aldeek ezagutza hori erabiltzen dutenean, partekatzen dutenean edo modu ezberdinetan hedatzen dutenean, Debagoienako energia trantsizioaren deliberazio prozesuari erreferentzia egin beharko diote (Creative Commons lizentziak ezartzen dituen irizpideen arabera - Attribution 4.0 International (CC BY 4.0)).

Hogeitalaugarrena.- Konfidentzialtasuna.

Aldeen partetik, beharrezko neurriak hartuko dira informazio instituzionalaren konfidentzialtasuna babesteko, pertsona fisikoen babesari buruzko araudia, datu pertsonalen tratamendua eta datuon zirkulazio librea arautzen dituen Europako Parlamentuaren (EB) 2016/679 Araudiak eta 2016ko apirilko 27ko Europako Kontseiluaren Araudiak eta Datu Pertsonalak eta Eskubide Digitalak Bermatzeko 2018ko abenduaren 5eko 3/2018 Lege Organikoak agintzen duenaren arabera.

Bestalde,

1.- Aldeek tratamendu konfidentziala emango diote Debagoienako trantsizio energetikoari buruzko deliberazio prozesuan parte hartzearen ondorioz eskuratzen

duten informazio, dokumentazio edo ezagutzari, betiere, helarazi edo erabilgarri ipini duen kideak hala kalifikatu baldin badu.

2.- Konfidentzial modura kalifikatutako informazio, dokumentazio edo ezagutza hori ez da erabiliko Hitzarmen honen xedea erdiesteko beharrezkoa denetik harago.

3.- Aldeek eskuratu ahal duten informazio oro beharrezkoa den arduraz gorde beharko da. Aldeek helarazitako informazioa eskuratzea baimenduko zaie soilik hura erabiltzearen ondoriozko xedea lortzeko haren berri izatea behar duten langileei, informazio hori eskuratu duenari Hitzarmen honen arabera konfidentziasunari dagokionez baitaratutako konpromisoak jakinaraziz.

4.- Hitzarmen honen arabera Aldeek informazioa komunikatzeak ez du inolako eskubiderik sortuko informazioaren hartzaileari jabetza industrial, intelektual edo *know-how* erako eskubide babestuen inguruan.

5.- Klausula honetan ezartzen den konfidentziasunezko konpromisoa hitzarmen honen indarraldirako eta ondorenerako ere izango da. Soilik, informazioaren titularrak egin ahal izango du publiko hala erabakiz gero, eta legezkoa balitz.

Hogeitabostgarrena.- Atxikipenak.

1. Hitzarmen honetara atxiki ahalko dira sektore publikoko, pribatuko edo komunitarioko bestelako eragile batzuk, beti ere mandatu organoak hala erabakitzen duenean aho batez.
2. Ildo berean, hitzarmen honen sinatzaileak hitzarmen honetatik bereizi ahal izango dira, eta horretarako prozedura definitu eta adostu beharko da.

Adostasun froga modura, aldeek hitzarmen hau sinatu dute (aldeko bana) eta ondorio bakarrarekin, goiburuan adierazitako tokian eta datan.

..... jaun/andrea,
Arrasateko alkatea

..... jaun/andrea,
Bergarako alkatea

..... jaun/andrea,
Oñatiko alkatea

..... jaun/andrea,
Aretxabaletako alkatea

..... jaun/andrea,
Eskoriatzako alkatea

..... jaun/andrea,

Antzuolako alkatea

..... jaun/andrea,
Aramaioko alkatea

..... jaun/andrea,
Elgetako alkatea

..... jaun/andrea,
Leitz-Gatzagako alkatea

..... jaun/andrea,
Deba Garaia Debagoienako Landa Garapenera Elkartekoko Lehendakaria

..... jaun/andrea,
Enpresareko

..... jaun/andrea,
Goinerreko

..... jaun/andrea,
Berener Komunitate energetikoko

..... jaun/andrea,
Ixotzen Komunitate energetikoko

..... jaun/andrea,
Ekiola Komunitate energetikoko

..... jaun/andrea,
Esnargi-K Koop.S Komunitate energetikoko

..... jaun/andrea,
Fagorreko

..... jaun/andrea,
Tantai Baso Jabe Kooperatibako

..... jaun/andrea,
Gizabidea Fundazioko

